

## На хвалитех стихиры, на 4, глас 1. Подобен: О дивнаго чудесе!

**1. Стих:** Хвалите Его на силах Его,/ хвалите Его по множеству величества Его.

**2. Стих:** Хвалите Его во гласе трубнем,/ хвалите Его во псалтири и гуслех.

О дивнаго чудесе!/  
Источник жизни от неплодныя раждаётся,/ и благодать плодородити светло начинаётся./  
Веселися Иоакиме,/ Богородицы быв родитель:/ несть ин якоже ты,/ земнородных родитель, Богоприятне:/  
Богоместимая бо Отроковица,/ Божие селение, пресвятая гора, // тобою нам даровася. **[Дважды.]**

**3. Стих:** Хвалите Его в тимпане и лице,/ хвалите Его во струнах и органе.

О дивнаго чудесе!/  
От неплодове плод возсия/ мановением всех Содетеля, и Вседержителя:/  
доблественно мирское благих разреши неплодство./ Матери, с матерью Богородичною ликуйте, зовуще:/  
обрадованная радуйся, с Тобою Господь, // подай миру Тобою велию милость.

**4. Стих:** Хвалите Его в кимвалех доброгласных, хвалите Его в кимвалех восклицаня./  
Всякое дыхание да хвалит Господа.

Столп целомудрия одушевлен, и светлое приятелище, блистающееся благодатию,  
Анна благославная явльшися, породи забрало воистинну девства,  
Божественное процветение: Яже всем девственным, и девства желающим дарование,  
девства доброту яве подающую, и дарующую всем верным велию милость.

### Слава, и ныне, глас 6. Самогласен:

Сей день Господень, радуйтесь людие:/ се бо света чертог/ и книга слова животнаго из утробы произыде,/ и яже к востоком дверь рождшися,/  
ожидает входа Святителя Великаго,/ едина и единаго вводящи Христа во вселенную, // во спасение душ наших.

**Славословие великое.**

### По трисвятом Тропарь праздника, глас 4:

Рождество Твое Богородице Дево,/ радость возвести всей вселенней:/  
из Тебе бо возсия солнце правды Христос Бог наш,/ и разрушив клятву, даде благословение, // и упразднив смерть, дарова нам живот вечный.

**ектении, и отпуст. Знаменуются же братия от иереа святым елеем: и поем стихиру самогласну праздника, юже хочет еклисиарх.**

## На 1-м часе Кондак праздника, глас 4:

**И**оаким и Анна поношения безча́дства,/ и Ада́м и Ева от тли смертныя свободистася Пречи́стая,/ во святем рождествé Твоём./ То пра́зднуют и лю́дие Твои́,/ вины прегрешений изба́вьшеся,/ внегда́ зва́ти Ти:// неплоды раждает Богородицу, и питательницу жизни на́шея.

## НА ЛИТУРИИ

### Антифоны изобразительны:

**Б**лагослови́, душе моя, Го́спода./ Благословен еси, Го́споди.

**Б**лагослови́, душе моя, Го́спода,/ и вся внутренняя моя́/ Имя свято́е Его.

**Б**лагослови, душе моя, Го́спода,/ и не забывай всех возда́ний Его́.

**О**чищающа́го вся беззако́ния тво́я,/ исцеляюща́го вся недуги тво́я.

**И**збавляюща́го от истления живо́т твой,/ венчающа́го тя милостию и щедро́тами.

**И**сполняюща́го во благих желáние твоё:/ обновится, яко орля, ю́ность тво́я.

**Щ**е́др и ми́лостив Госпо́дь,/ долготерпелив и многоми́лостив.

**Б**лагослови́, душе моя, Го́спода,/ и вся внутренняя моя́/ Имя святое Его́.// Благословен еси, Го́споди.

**Х**вали́, душе моя, Го́спода./ Восхваляю Го́спода в животе моём,/ пою Богу моему, до́ндеже есмь.

**Н**е надéйтесь на князи, на сыны челове́ческия,/ в нихже несть спасéния.

**И**зы́дет дух его, и возвратится в зéмлю сво́ю:/ в той день погибнут вся помышлéния его́.

**Б**лаже́н, ему́же Бог Иаковль помо́щник его,/ упование его на Го́спода Бо́га своего́.

**С**отво́ршаго небо и зéмлю,/ море и вся, я́же в них.

**Х**раня́щаго и́стину в вéк,/ творя́щаго суд оби́димым,// дающа́го пищу́ а́лчущим.

**Г**оспо́дь решит оковáнные,/ Госпо́дь умудряет слепцы́./ Госпо́дь возводит низвэ́рженные,// Госпо́дь любит пра́ведники.

**Г**оспо́дь хранит пришéльцы,/ сира и вдову при́имет,// и путь грéшных погуби́т.

**В**оцари́тся Госпо́дь во вéк,/ Бог твой, Сионе, в ро́д и ро́д.